

四庫全書

集部

欽定四庫全書

集部

明詩綜卷

二十九
三十

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶臺臣潘曾起

謄錄監生臣楊恪

欽定四庫全書

明詩綜卷二十九

翰林院檢討朱彝尊編

謝

遷

一首

遷字于喬餘姚人成化乙未賜進士第一累官

少傅兼太子太傅戶部尚書謹身殿大學士贈

太傅謚文正有歸田橐

李時遠云木齋歸田後專事吟詠有冲澹閒雅

之趣山莊一首
真得陶家情景

早過山莊避暑次陶公韻

侵晨理孤櫂山居將避喧好風忽南來吹我烏帽偏宿
鷺未移渚落月猶在山候門兩稚子問我何時還高山
與流水此意向誰言

王 鏊 四首

鏊字濟之吳縣人成化乙未賜進士第三授翰
林編修歷侍講諭德進學士擢吏部侍郎累官
少傳戶部尚書武英殿大學士卒贈太傅謚文

恪有震澤稟

邵國賢云濟之詩蕭散清逸有王岑風致

靜志居詩話潛之以經義重詩非所長集中十二絕句甚得諷諫之體今錄其三諸公南巡詩

雖多皆當遜席

己巳九月舟次相城

幾年約茲遊為訪石田叟石田今已亡不使此言負相知
三四人挈舟過湖口行行抵相城自卯將及酉四顧
何茫然天水合為數茅屋數家存荒蒲與衰柳本來魚
鼈宮自合鷗鷺宇始田者為誰餒也非自取有司事誅

求亡者十八九念此為徬徨獨立延佇久作詩當風謠
以告民父母

絕句 三首

少年天子重邊功烏帽戎衣手角弓行徧漁陽來上谷
並無曠騎到雲中

安化跳梁即日平中原羣盜敢縱橫洪都定亂誰堪使
除是君王自將兵

燕雲漠漠鎖重樓八駿驅馳正未休莫道十旬猶不返

金陵原是帝王州

馬中錫

三首

中錫字天祿故城人成化乙未進士拜刑科給事中再疏言事受杖出為雲南按察僉事改陝西入為大理少卿以右副都御史巡撫宣府正德初起撫遼東召為兵部侍郎劾罷劉瑾黨之冒邊功者瑾矯詔改南京工部尋褫職瑾誅起撫大同召為右都御史督軍務討流賊陞左都

御史掌院事以師老玩寇徵下獄踰年卒有東

田集

西掖晚歸有感時事聊賦述短章用呈同志者

虛窗缺月照人寒殘雪留簷凍不乾
衰信已憑雙鬢寄世緣聊作一枰看
斜封官好空批敕神武門高未挂冠
誤却登山與臨水十年騎馬走長安

晚渡咸陽

野色蒼茫接渭川白鷗飛盡水連天
僧歸紅葉林間寺

人喚斜陽渡口船
表裏山河猶往日
變遷朝市已多年
漁翁看破興亡事
獨坐秋風釣石邊

謁元世祖廟

世祖祠堂帶夕曛
碧苔年久暗碑文
薊門此日瞻遺像
起輦何人識故墳
棹楔半存蒙古字
陰廊尚繪伯顏軍
可憐老樹無花發
白晝鴉鳴到夜分

曹潔躬云用事典實鑄辭悽惋可稱

絕唱起輦
見元史志

吳洪一首

洪字禹疇吳江人成化乙未進士累官南京刑部尚書贈太子少保

詩話少保弘治中官太僕卿與禮部尚書長洲吳原博禮部侍郎嘗熟李世賢都御史長洲陳玉汝吏部侍郎吳縣王濟之詩酒唱和立五同會五同者同時也同鄉也同朝也而又同志也同道也因以為名亦曰同會者五人爾少保因屬越人丁綵繪作圖五家各藏其一於是原博序之濟之題詩其後所云鄉邦自昔誰同會人事從來苦不齊是已今諸家所藏或亡于兵或燬于火予從同官徐電發所獲見一卷蓋少保家藏物也

客中和史明古

一尊誰共合朋簪又見空階覆綠陰
草色不消游子恨
月光偏照故人心
霜前白雁音書在
雨外青山別路深
安得攜琴溪上去
社中重覓舊知音

秦 璫 一首

璫字廷贄崑山人成化乙未進士官至貴州按察副使

閒居

絃桐不終曲坐起囊我琴非憚摩拊勞所嗟無賞音中

心潛鬱陶曳杖循空林松風有古意石泉清俗心愛此
憺忘歸前山生夕陰

王

弼

一首

弼字存敬黃巖人成化乙未進士除溧水知縣
入為刑部主事出知興化府有南郭集

舶上謠

連艘飛過石頭城獵獵黃旗發鼓聲中使面前傳令急
江南十月進香橙

彭

綱

三首

綱字性仁清江人成化乙未進士雲南提學副

使有雲田集

宿鄧川驛

風走落葉聲山犬吠不已披衣夜出戶明月照溪水

李渭

清云誦
之冷然

姚安分司

吟人夜未眠迢迢漏初永起步山月中疎枝露猿影

李渭

消云詠猿不以聲而以影彌見體物之工妙

詠刺桐花

樹頭樹底花楚楚風吹密葉翠翩翩露出幾隻紅鸚鵡
楊用修云刺桐花雲南名為鸚哥花形酷似之彭公此詩本四句命吏寫刻於偏遺其一句復誦之自覺意足乃不更改其詞風韻可愛

洪貫二首

貫字唯卿鄞縣人成化丁酉舉人鄧州教諭遷

從化知縣改政和有太白山人橐

李杲堂云先生詩法盛唐

嘗擬杜陵秋興八首傳至京師李文正大加賞
歎晚結廬東皋自號稼翁年九十尚不忘搗翰
每一詩成好事
者輒傳寫焉

唐宮詞二首

花萼遙連務本樓五王文采盡風流不知凝碧池頭宴
落盡宮槐一樹秋

雙飛金鳳綠雲翹舞袖三千盡絳綃一自鑒輿西幸後
白頭如夢說前朝

梁儲一首

儲字叔厚廣東順德人成化戊戌進士選庶吉
士授編修進侍講洗馬掌翰林院學士選吏部
侍郎進尚書累官至少師兼太子太師華蓋殿
大學士卒贈太師謚文康有鬱州遺藁

元夜應制

雲中珠翠壓鰲頭雉尾雙雙護冕旒聖主經年少巡幸
春來方覩屬車遊

伊乘一首

乘字德載上元人成化戊戌進士歷官按察僉
事有集

遊虎丘

舟行山在眼到門山忽失去郭僅七里攀磴窮百尺巖
姿互明晦潭影杳深黑步倦松暫憩醉眠草堪席不逢
試劍人猶覩試劍石臺殿半空起難夫下方隔經聲雜
梵唄禪定悟空寂晉唐歷劫多劉白不世出閨劇固殊
調登覽各有適重來預作期昨游宛然憶了性未有因

寓形何苦役依此憺忘歸於焉永終日

林

俊

四首

俊字待用莆田人成化戊戌進士授刑部主事

歷員外下獄謫姚州判官復官南京刑部員外

擢雲南按察副使進按察使調湖廣轉廣東右

布政使以僉都御史巡撫江西改四川陞右都

御史工部尚書改刑部加太子太保謚貞肅有

見素西征集

楊應寧云見素詩宗子美晚乃出
入黃山谷陳無已間初視之若有

隱澀語久而咀嚼悠然有餘味焉
王元美云
林待用如太湖中頑石非不具微致無乃癡重
詩話中山狼小說乃東田馬中錫所作今載其
集中世傳以訾獻吉者數其負德誣也攷之康
李未嘗隙未黃才伯有讀見素抹空同奏疏詩
云憐才不是雲莊老愁殺山中獵後狼然則當
日所訾乃
負見素耳

門扇峽

灤西一舍近兩山勢迴合巨石壯此門鐵衣護周匝
楚蜀錯犬牙乾坤互開闔當關一夫守萬馬不敢踏雲龕
嵌玲瓏元氣深吐納推蓬見巫峰
哀猿響相答

別鄉人

驛路迷燕浦官梅動越吟相看今日意同是故鄉心
祖道寒沙上傳橈綠柳陰滄洲有奇事未老忽抽簪

送方上舍

客路阻風沙離心逼歲華潮平今夜月梅作去年花
囊澀書還購天寒酒待賒席珍逢聖主未許卧烟霞

有題

山崦雲猶暮江天雨欲晴院深芳草合日落野舟橫
古

路稀人跡青林但鳥聲春風期載酒相對面柴荆

陳章一首

章字一夔松江華亭人成化戊戌進士除刑部主事歷郎中降瑞州府同知遷高州知府移黃

州有西潭臺

詩話一夔自高州移黃州吳匏菴哀詞云一朝下恩旨稍幸得量移齊安佳山水足以為詩資如何始聞命已與人世辭蓋未至齊安而沒也又云平生無所好所好止於詩積成西潭臺千首尚多遺今其集竟不可得

即席贈趙栗夫

菜市街西新卜居豆棚瓜蔓共蕭疎胸中富有書千卷
誰信家無儋石儲

陳璫

璫字玉汝長洲人成化戊戌進士改庶吉士授
戶科給事中歷南京都察院左副都御史有成
齋集

詩話成齋出西涯之門當時雖不以詩名而恒
與西涯方石斲菴諸公接席聯句知見賞於西

涯者
深矣

曉經分水

卧聞水禽聲推牕看分水低岸雜茭蒲吳淞宛相似波
澄綠漪漪流急清駛駛荇舞翠帶長鷗翻白雪比岳楊
遷嬌鶯柔莎露游鯉分明一鏡開身在鏡光裏停梭緩
緩行神爽情亦喜我苦思歸人鄉間將近矣

陳
娃

一首

娃字文用閩縣人成化戊戌進士有留餘橐

次毛叅將秋日江居

雲淨羣峰出江空一鳥遲
雨前薜補屋霜後菊編籬
巢燕非新主沙鷗是故知
考槃人自取天地豈吾私

包鼎一首

鼎字汝調嘉興人成化戊戌進士除兵部主事
歷郎中出知池州府

己丑下第南還

孤舟千里賦南歸
慚愧逢人問禮闈
野浦關情芳草遠

曲江回首杏花非
半生事業雙蓬鬢
十載風塵一敝衣
臨水高歌向何處
夕陽煙樹共依微

林

榮

一首

榮字仲仁合浦人
成化戊戌進士
厯官雲南按察副使

薊門聞笛

冒寒重到薊門遊
羌笛嗚嗚起戍樓
應有開元遺譜在
月中三弄小梁州

孫 衍 一首

衍字世延松江華亭人成化戊戌進士除知泗
陽州遷南京刑部員外郎出為延平知府有雪
岑集

寄沈宗遠

挂席曾逢江上舟別來彈指又經秋閒從何處爭棋局
醉共誰人較酒籌金鯽魚池芳草合女蘿花樹小庭
幽客中無限相思意坐對寒燈獨自愁

黃 珣一首

珣字廷璽餘姚人成化辛丑賜進士第二累官
南京吏部尚書贈太子少保謚文僖

應制勸農

四民皆天職嗟農獨苦辛所以古哲王巡省及茲辰簫
鼓吹豳頌訓迪良諄諄東郊土脈動好鳥鳴芳春桑園
拂其羽催耕一何頻乘時播嘉種原隰交昉昉念茲民
所天珠玉安足珍一日苟不作飢寒將立臻勿恤需體

勞但憂年歲屯霑體勞尚可歲屯傷我民憶昔先皇時
端居軫郊閨載歌憫農詠丕揚列祖仁禁苑藉千畝雨
暘雩百神玉食豈不足貴令四海均九重尚結念況爾
謀其身古人有良言歲計在于寅豈伊公家賦父子亦
以親春風正發育萬物皆鮮新勉矣東作力佇看西成
裡

趙寬一首

寬字果夫吳江人成化辛丑進士除刑部主事

歷員外郎中出為浙江提學副使遷廣東按察使有半江集

題畫

細雨入林深孤雲映山薄何處是歸舟臨風倚江閣

張

吉

二首

吉字克修餘千人成化辛丑進士除工部主事坐上疏貶景東通判歷官貴州左布政使有古

城集

詩話古城窮理講學具詩罕傳觀其序晦菴感
遇詩謂蕪蘇李之體製陶孟之風調韋柳之音
節非漢晉以下詞人所及生乎後者不根於此
而有能詩聲我不敢知也其論詩亦非戶外語
今錄李忠烈祠送迎神曲李東陽記云成化五
年春正月長沙府知府事臣錢對言臣所守潭
州當元兵至時宋知州李芾盡地而守士卒皆
殊死戰城且陷芾召帳下沈忠遺之金曰吾力
竭當死吾家人不可辱於俘汝盡殺之而後殺
我忠辭不獲命乃醉其家人徧刃之芾亦引頸
受刃忠焚芾居還自殺其妻子復至火所自殺
是時先芾死者知衡州尹穀死於火參議楊震
死於池後芾死者幕僚陳億孫顏應焱潭民多
舉家自盡城無虛井縊於林者相望其事昭晰
在史傳布揚在天下決洽在郡人耳目而郡之
祀事不立其為闕典不細臣已立祠於芾所居

故地以尹穀等配著諸祀典儀物使有司永有
所遵式事下禮部具春秋祭幣用豕一羊一案
盛備餘各羊一制可具本
末頗詳附注以便觀者

李忠烈公祠迎送神樂章

紛犀甲兮翠旂亂湘流兮若雲春露兮秋霜無遠無近
兮援枹執鼓折芳馨兮代舞旅牲醴兮芬熏公入廟兮
有白其駒我維公駒兮在庭之隅公不醉飽兮我呻且
吁

脩蛇兮綦綦猗犬兮唁唁臨衝兮第第彊騎兮說說兵

血戰兮幾盡涕橫流兮霑巾彼蒼者天兮胡不仁死為
趙氏鬼兮生為宋臣嗚呼我公兮人道之紀口不忍言
兮心曷其已潔我肥羜兮稱我兕觥千秋萬歲兮祀事
孔明

盧格一首

格字正夫東陽人成化辛丑進士除貴溪知縣
擢江西道御史有荷亭集

詩話正夫難經仇仇雖朱子亦不心服其讀易
詩云三聖若專尊卜筮宣尼何用絕韋編又云

世儒問我五經原易道原居六畫先若說義文
專卜筮街頭有藝盡真傳又詠詩云夫子刪詩
立義精國風雅頌各分明考亭半作淫奔什何
用為邦放鄭聲所撰荷亭辨論八卷同郡章楓
山不以為非戢山劉念臺為作集序而曰後儒
不及前人由其果於自信之意多而存疑者寡
也幾於袒左矣

遣興

莫歎風塵行路難
閒過僧舍借花看
數聲啼鳥不知處
滿地綠陰清晝寒

葉元玉

元王字廷璽清流人成化辛丑進士有古崖集

次龍門衛作

龍門關外龍門衛元是紛紛狡兔場今日草枯蕃馬瘦
將軍穩卧綠沈槍

王

敬

三首

敬字漢英南京錦衣衛人成化辛丑進士歷官

太子少保兵部尚書贈太子太保

渡大同江和董內翰

涓水元歸海山城半入江
春潮翻石壁飛雨打船窗
作賦才誰健凌雲氣未降
濟川輸董相不日看經邦

詩話宮保與董文僖越同使朝鮮
送相唱和而諸詩蒼老頗勝董公

登浮碧樓

山閣凌空起孤雲挾雨飛
好花臨驛路小艇占漁磯
石磴斜通郭煙邨半掩扉
主人留客意薄暮肯言歸

過箕子故城有感

柳暗荒城水滿渠
幾家門巷帶邨墟
井田已廢千年後

故壘曾經百戰餘果下更無三尺馬盤中時有八梢魚
遺封舊墓知何在試一停車問象胥

方

向

一首

向字與義桐城人成化辛丑進士授南京戶科
給事中以言事謫多羅驛丞後官至瓊州知府
有素亭集

桃源道中

桃源西望是辰州兩境中分五置郵征旆影隨紅樹沒

斷橋水帶夕陽流
關山迢遞孤臣路
風物淒涼滿地秋
半世飄零竟何事
獨騎瘦馬重回頭

侯直一首

直字公繩松江華亭人
成化辛丑進士
厯官廣西參議

夜集送楊君謙

馬蹄日日走紅塵
自怪微官繫此身
滄海煙波無限好
未歸真是不如人

鄭 瑗 一首

瑗字仲璧莆田人成化辛丑進士官郎中有省

齋集

獨不見

東飛伯勞西飛燕我所思兮獨不見歲云莫矣多霜霰
日月推遷玄髮變鬢鬢處廓誰與鄰高山無蹊河無津
車粼粼馬駢駢車馬縱橫徧城闌獨不見意中人

邵 寶 六首

寶字國賢無錫人成化甲辰進士知許州入官

戶部歷郎中出為副使以副都御史總漕江北

再起巡撫貴州陞戶部侍郎終南禮部尚書卒

謚文莊有容春堂前後集泉齋勿藥集

李賓之云國賢

集該括情事摹寫景物極所欲言而無冗字長語王濟之云國賢古詩有魏晉之風師其意

不師其辭興寄閒遠體裁簡重林待用云國賢根幹宋儒標致秦漢莊以潔和以平紆徐客

與辨博而不肆浦文玉云先生詩謹重精純得諸宋雄渾森嚴得諸唐爾雅深厚得諸漢

鍾伯敬云空同出天下無真詩真詩惟邵二泉耳

詩話二泉詩如平原彌望雖
盡剪其荆榛惜少芳華可采

三一亭詩為俞吏科作

暇望西岡亭我懷樂共子有言感予衷千載猶仰止生
三事之一誰能不由此出為升堂由入為趨庭鯉廊廟
復江湖蒼生共憂喜俯仰天地間念念何時已所不盡
吾心有如此溪水

水北山莊圖歌

近來善學孟端畫眼中吾許張臨湘臨湘病後作此幅

樹色慘澹山蒼蒼水北山人好事者要我題詩惠泉下
秋林逝矣不可招臨湘臨湘亦其亞菊有黃華夜榻深
長吟偶坐吾玉林樽前擊節興未已誰能和以無絃琴
聽松菴裏廬山壁少日相看眼雙碧酒酣且作山人歌
莫向山僧問疇昔

夜坐有懷浦文玉

哭子身仍病懷君我亦傷江湖秋欲老風雨夜初長鶴
夢蕪汀遠蛩聲草砌涼蕙葭空獨賦愁絕不成章

雞鳴山

鍾山西引一峰高，雲磴盤紆步不勞。
畫裏樓臺自鐘鼓，望中城市有林皋。
江流入海初奔放，世路懷人更鬱陶。
却倚崔嵬發長嘯，松風何處起秋濤。

孟城即事

孟城驛前吟夕陽，高郵湖上好秋光。
紅分菡萏初經雨，綠滿蒹葭未受霜。
遠浦有波長浴鷺，近隄無路尚垂楊。
南來時見吳江檝，却倚船窗問故鄉。

乞終養未許

乞歸未許奈親何帝里風光夢裏過三月春寒青草短
五湖天遠白雲多客囊衣在縫猶密驛騎書來字欲磨
聖主恩深臣分淺百年心事兩蹉跎

喬宇

六首

宇字希大山西樂平人成化甲辰進士授禮部
主事轉吏部歷員外郎中遷太常少卿光祿卿
陞戶部右侍郎遷左侍郎出為南京禮部尚書

改兵部尋拜吏部尚書加少保兼太子太保卒

謚莊簡有克蒙橐

王元美云喬希大如漢官出臨遠郊亦自粗其威儀

詩話莊簡詩有雄傑當時與邊李實為唱和交
顧華玉叙其紀行之作謂正者準雅則奇者挾
幽險是不特功存社稷亦風雅之領袖也

送甕山偶過潘南屏

朝日散林薄鐘聲出翠微青山面湖立白鳥背人飛
勝地不常有幽期能久違會逢高士話相對欲忘歸

秋風亭下泛舟

荒亭寥落野雲空
漢武雄才想像中
簫鼓橫流

一作開
應聲

畫鷁帆檣飛影動
晴虹山分秦晉羣
峰斷水入河汾兩

派通少壯幾時還
老大不堪

一作須

回首歎秋風

登大同城樓

東南山勢遶皇都
西北樓高眺望孤
荒磧平沙連塞遠
片雲寒雁入空無
長城萬里早秦築
文德千年仰舜敷
今日北門誰鎖鑰
受降城外盡輿圖

幕府山

說著看山興欲飛
湖西雙逕踏霏微
寧辭九日登高會
況是諸軍奏凱歸
林外鐘聲開宿靄
江頭帆影送斜暉
亦知歡會何終極
霜露休教上客衣

懷張南園

六詔山川萬里餘
秋來長恨賦離居
雁歸不過衡陽去
何處逢人好寄書

寄劉南坦司空

江上青山多白雲
秋來離思日紛紛
別來擬鼓中流櫂

采得芙蓉一贈君

蔡清一首

清字介夫晉江人成化甲辰進士歷官南京國

子監祭酒卒贈禮部侍郎萬厯中詔特祀于鄉

追謚文莊有虛齋文集

林見素云介夫詩文別出體格掩人心而繫名

教卒澤於仁義道德粹如也

別鄒汝愚謫雷州吏目

識君未三月別君遽萬里吾豈小丈夫淚落不能止

范

甫云言
簡意長

王雲鳳 三首

雲鳳字應韶遼州和順人成化甲辰進士除禮
部主事劾太監李廣下獄降知州陞陝西提學
僉事歷副使按察使召為國子祭酒以右僉都
御史巡撫宣府有博趣齋橐

詩話虎谷與王恭裏喬莊簡齋
名號河東三鳳頗留意吟詠

古意

中夜有所思所思君不知春風吹露草秋風吹霜枝所以別離人悠悠負心期別離非所惜年華難再得只恐君來時妾已無顏色顏色既已非君寧無歎息

送孟仲平陝西屯田僉事

璽書初下建章宮諸將邊隅已望風秦甲連營金窟北漢屯分畝玉關東山薶凍雪侵雲白水落寒巖繞澗紅聞道西羌今款塞莫留魏尚久雲中

送客

春濕蒸雲雨散絲飄飄游子別離時愁看陌上青青草
送盡行人總不知

儲

巖

七首

巖字靜夫泰州人成化甲辰進士授南京吏部
主事歷郎中改北司考功陞太僕寺少卿進本
寺卿轉都察院右僉都御史歷戶部左右侍郎
改吏部卒謚文懿有駟野柴墟二集

顧華玉云
公言冲澹

沈鬱
唐之風

詩詒文懿掉鞅詞場與楊君謙徐子仁杜樵居
矜契君謙嘗題扇寄之文懿愛惜緘題字未開
視也一日子仁樵居過出扇作畫文懿因題詩
寄君謙云為惜緘題入手遲清風十里故人思
畫成一事知還欠封寄江南乞寫詩亦藝林韻
事也李獻吉敘倡和詩云予承乏郎署所與倡
和則揚州儲靜夫趙叔鳴無錫錢世恩陳嘉定
泰國聲太原喬希大宜興杭氏兄弟彬州李貽
教何子元慈谿楊名父餘姚王伯安濟南邊庭
實其後又有丹陽殷文濟蘇州都元敬徐昌穀
信陽何仲默其在南都則顧華玉朱升之其尤
也當日倡和文懿實居其首及李何教行執政
欲加擯斥文懿以文章復古為國家元氣極其
扶植得不傾陷風雅蔚興斯人攸賴今之論詩
者鮮及之論世者所當表微也文懿卒於南都
在正德癸酉後三年歸柩海陵攢於墓舍丁丑

將葬啓視棺上生黝墨成繪畫文具畫家皴染之法前則奇石枯松旁出二篠莖葉咸備左則梅林夭矯梢著數花右如左而樹枝差短其文深入木理四方來觀詫為神異華玉為作靈徵記此事甚怪近靈壽傳去異撰有明異叢寶應劉禹峰撰史外叢譚探幽索隱獨此未載故附之識

席上賦史巽仲歸雲洞

悠揚滿洞中歸來不知處曉起語農人春田夜多雨却

問洞中雲何時下山去

有懷

獨坐誰為伴清謠夜不眠懷人千里共看月幾回圓秦
塞連雲戍荆門下峽船歸程那可料依舊折津年

春晦贈別

殘春餘幾日欲去且相留脈脈難為別慙慙不自由天
涯芳草路花外夕陽樓誰道文園客新來賦倦遊
病較芳時晚春含晦日陰曉鐘人不寐舊雨客難尋院
濕蛛絲重庭虛鳥跡深平明有幽事移竹滿西林

大房金源諸陵

金匱山房詩集 卷二十九
奉先西下亂山侵澗道迴旋入暮林羊虎半存行殿跡
莓苔盡蝕古碑陰秋山春水風流遠大定明昌德澤深
却是宣和解亡國穹廬黃屋豈初心

望岐溝

野水荒煙沒斷橋欲尋遺老問前朝不因書記班師奏
未必岐溝定屬遼

老米店有感

層冰一夕塞河船記得攜家已十年鮭菜燈前誰共飯

月明行店一悽然

楊循吉

一首

循吉字君謙吳縣人成化甲辰進士除禮部主事以病乞歸有松籌堂集

詩話君謙官儀曹人目為顛主事每稱病不出長官厭之人或勸之歸賦詩云鄙人自從三月來腹心久已病癥瘕晨興至午尚不食夜枕呻吟睡尤寡有人謂我病如此何不抽身向林野一聞此言即再拜誰有愛人如此者久知山水淡有味漸覺功名輕可舍乘今秋事天漸涼定買扁舟向南下遂疏請致仕沈啟南聞其歸賦詩云都門祖帳百花飛多見龍鍾賦式微較取

柳條千萬折不曾送一少年歸是時君謙年僅三十有一也其後康陵南巡為伶人臧賢所薦冠武人冠見帝應制賦打虎曲稱旨恒在御前填詞與俳優雜處乃謀於賢請急放歸其論詩曰詩不當以格律體裁為論惟求直吐胸懷實敘景象婦人小子皆曉所謂然後定為好詩其他鉅釘攢簇拘拘拾古人涕唾者亦木偶之假綫索以舉動者吾無取焉故其詩多俚近然如陽山大石一篇賦情傲兀用韻妥帖非讀破萬卷書不能作也君謙好蓄異書孜孜不及題書厨詩云吾家本市人南濠居百年自我始為士家無一簡編辛勤一十載購求心頗專小者雖未備大者亦畧全經史及子集一一義貫穿當怒讀則喜當疾讀則瘞恃此用為命縱橫堆滿前當時作書者非聖必大賢豈待開卷看撫弄亦欣然奈何家人愚心惟財貨先墜地不肯拾

斷爛無與憐朋友有讀者悉當相奉捐勝付不
肖子持去將鬻錢又鈔書詩云沈疾已在躬嗜
書猶不廢每間有奇籍多方必羅致手錄兼買
人恒輟衣食費往來遠案行點畫勞指視成編
亦艱難把玩自珍貴家人怪我癖既宦安用是
自知身有病不作長久計偏好固莫捐聊爾從
吾意是時吳中藏書家多以祕冊相尚若朱性
甫吳原博閻秀卿都元敬輩皆手自抄錄今尚
有流傳者實
君謙倡之也

詠陽山雲泉菴大石奉和諸公同游聯句之作

偉哉此陽山有石俟歌誦形將冰塊截勢與蓮花共仰
觀一何高登陟不可鞚鳥飛必徊翔雲出自騰涌孤員

外成嶠空朗中含洞瘦如辟穀良清若食李仲深思殆
天設乍至令人恐濃蘿作垂陰寒泉滴為凍戴菴亦顛
危攜觴更交綜耳脇或駢攢勤拳時獨送巍巍上少並
森森下多從荒厓始誰開倒樹諒非種在茲三吳間當
以九鼎重崇巖借冠冕卑巒聽提控勞呼猿固匿被壓
松堪訟曲躬始得門側身還入街拂苔劣容眠收乳兼
資用志猶記秦餘材曷遺禹貢立久氣濕袍嘯高聲答
甕論年越殷周言時晦唐宋一為佛者居永作游人奉

病宜謚著史寐稱搏養永四方傳不誣諸公評切中臨
谷足還酸乘巔目偏縱支頤詎厭看極口難竭諷鬼鑿
手須臾鯨負背應痛東岱徙小魯西華繆推雍懸磬風
發鳴香爐煙結供曝沙伏靈龜食岡停遠鳳是知隆拔
羣所貴秀合衆偷餘殿容棖就隙亭閣棟枯藤蔓穿竅
長蛇舌撩縫輕盈受指彈玲瓏脫泥壅芾拜本無忝羽
撼爭得動栽培稀尺閑構架靡寸空炎伏涼自生清秋
月堪美林深必賴燭嵐酷能作𪔐星光猶立芒龍吟殊

叶碛嶺獅馴已賓阜虎寧敢閑久嗟隔勝賞頻勞落清
夢即欲營終棲其奈懷微俸

鮑

楠

一首

楠字良用歙縣人成化甲辰進士官南京戶部

員外郎有龍山集

舟中

野渡溶溶春水夕陽點點寒鴉欸乃數聲何處行人一

擢天涯

祝萃一首

萃字維貞海寧人成化甲辰進士歷官陝西提學副使有虛齋遺集

紀行

訪舊指樵李權出武原谿亭午歷輿城燠焉如春熙舟人共裸裼愛此南風吹老夫厄蓬櫳默坐心獨疑雲雨易翻覆變態不可知戒言避中流沿涯泝清漪屏翳忽四合飛廉驟如馳艦首屢低昂怒波揚其威所幸誕登

岸危致檣櫂摧顧彼鄰舟人哀哉沈鷗夷古云行路難
此語良不非相望不百里尚爾逢顛危而況千里程能
保無嶮巇裁詩紀所遭進退宜知幾

費宏

宏字子充鉛山人成化丁未賜進士第一累官
少師兼太子太師吏部尚書華蓋殿大學士贈
太保謚文憲有鵞湖摘橐

有感次韻

妖孽纔消一戰收，猶煩禁旅扈宸遊。
人縱有瑤池樂，野老翻深杞國憂。
極北五雲瞻帝座，淮南千里候龍舟。
秋風忽漫悲搖落，鴻雁嗒嗒在荻洲。

詩話文憲在康陵時以字正拒寧庶人此詩因南昌已平而康陵猶南征而作也

石

瑤八首

瑤字邦彥，藁城人。成化丁未進士，改庶吉士，授
簡討，歷修撰，侍讀學士，遷國子祭酒，陞南京吏
部侍郎，改禮部，尋掌翰林院，陞禮部尚書，轉吏

部入直文淵閣進武英殿大學士加少保兼太

子太保卒贈太保謚文隱更謚文介有恒陽集

李賓之云邦彥詩詞皆中矩度而七言古詩尤
超脫凡近衆所不及 王元美云石少保如披

沙揀金時
時見寶

詩詒少保爰立在水陵初年是時諸臣以議禮
忤旨帝初欲援以自助而鯁直自守至三封內
批帝心弗善也故雖位列中台其詩多塞座而
不釋如云黽勉二十年十事九失意又云人生
值命薄所遇多不平又云雖云日偃仰亦復成
局促又云趾發物已迂意行悔相連又云軒冕
豈不華一喜生衆惕又云幡幡行春鳥解使朝
變昏又云古來忠與邪往往激禍淺又云苟移

造化柄蕢土亦易崇又云寧為白壁碎不作脂
與常寧為鈍劍折不作鉤與錐又云事去朝露
空安辨窮與達又云牋詰日紛綸君臣互相諛
但聞都俞聲無復涕與吁又云終然千古下忽
有知已歎蓋當日綸扉之間未盡和衷之雅一
傳衆咻誰與為善乃知人生不得行胸懷雖作
相與不遇等也近見東南文士有推少保詩為
北方之冠者又或謂得長沙之指授俱未盡然
然其詩頗類明
初西江一派

送邵國賢分韻

君帆已南下僕念日旋軫豈謂萍水分如失繩與準平
生東朝歡肝膽屢得盡曠然趨大塗一笑破畦畛

鉅用不微多士宜汲引誰撞待問鐘
虛往歸必相吾聞
凌霜幹乃自階下筍願培正直姿
出身濟時閔

雜詩

皎月邈中天清光照無極
秋毫森可數萬里經一拭
寧知黑水潭其下深莫測
龍蛇方蚺蜥行者為惻惻

春日雜言

長空多浮雲微雨霑四郊
美人隔蘭渚雜佩不可要
去年梁間燕今歲將尋巢
時物各芬芳吾興亦飄飄

秋蓮曲

西塘菡萏初破紅小舟蕩漾東南風羅裙曳水蘸輕碧
驚起沙頭雙落鴻昨日采蓮蓮尚好今朝采蓮蓮已老
綠房結子空垂垂翠黛朱顏可長保江頭日暮生嫩寒
鴛鴦雙飛不過灘回頭女伴各無語淚灑銅仙承露盤

芟田行

芟田復芟田短刀長柄颼颼然開鑣先芟三百束村後
村前轟轟陸續南風吹場場土乾烏犍載車角聲聒去年

種麥麥不成今年麥熟家無贏為語農夫合勤儉汲水
聊春麥仁飯

春渡滹沱

世路無閒日風波歲歲新東風沙上鴈落日岸頭人去
國曾千里還家又一春林花應笑客夏病往來頻

六言

密雲欲雨不雨繁杏將開未開日暮小樓凝望江南燕
子歸來

會昌宮詞

羽節貂裘謁內庭
太和公主髮初星
御前細說和番事
六院都來墮淚聽

蔣 冕 一首

冕字敬之全州人成化丁未進士累官少傅兼
太子太傅戶部尚書謹身殿大學士贈少師謚
文定有湘皋集

湘山寺

孤墻湧山腰鐘聲隔煙樹朝暮見雲飛不見雲歸處

毛紀一首

紀字維之掖縣人成化丁未進士選庶吉士授
檢討歷修撰侍讀左諭德陞學士遷戶部侍郎
拜禮部尚書入直內閣進少保兼太子太保吏
部尚書謹身殿大學士卒贈太保謚文簡有鼇
頭類橐

武宗皇帝挽歌

玉輦今何處宸遊事已空淚多湘水竹悲切鼎湖弓汗
簡十年後釣天一夢中空餘舊戎帳金甲凜霜風

陸完一首

完字全卿長洲人成化丁未進士累官太子太
保吏部尚書坐納宸濠賄論死議平劉六等功
戍泉州籍其家有水村集

題夏禹玉長江萬里圖

雲山蒼蒼江漠漠紹興年間夏珪作珍重須知應制難

卷尾書臣字端恪却憶當時和議成偏安即視如昇平
惟開緝熙較畫史兩河淪棄無人爭斯圖似寫南朝土
還有樓臺在煙雨釣叟暴翁不可呼漁舟野店誰能數
但覺層層境不同林泉到處生清風意遠筆精工莫比
只許馬遠齊稱雄中原殷富百不寫良工豈是無心者
恐將長物觸君懷恰宜剩水殘山也畫終思效一得愚
更把飛鴻添在圖願君且向飛鴻問五國城頭信有無

王鴻儒 二首

鴻儒字懋學南陽人成化丁未進士由戶部主

事歷官吏部侍郎南京戶部尚書卒謚文莊

擬楊鐵崖小游仙詞

二首

方壺員嶠月初生海色如銀萬頃明一片彩雲當面墮
東華童子召飛瓊

一別良常歲月賒茅君相念寄瑤華五雲閣吏無人換
猶是當年蔡少霞

楊廉

六首

廉字方震豐城人成化丁未進士累官南京禮部尚書贈太子少保謚文恪有月湖集

詩話月湖詩派本白沙定山其言曰近代之詩大抵只守唐人矩矱不敢遠越一步惟陳公甫莊孔暘獨出新格予好公甫詩既選注之好孔暘詩又選注之其論絕句云於宋得漁洛關閩之作於元得劉靜修於國朝得陳公甫莊孔暘因類成一帙名曰風雅源流其師心若是然其七言長篇頗具排奭之力五言亦以樸勝不盡類陳莊二公

過牖簡莫水部

疎牖密牖連一帶南船北船此闕隘往年水小謹啓閉

十日五日牯邊待今年濟水偶然溢雪浪崩騰復砰湃
下如落井上登天三老無功神是賴誰移兩山作一門
管束千流與萬派當初本為蓄水設豈知水大亦為閼
世間未有無弊法十利未免兼一害人言月河且緩築
不然水勢無由殺征夫自是懷往塗見月望弦今已再
履霜又恐阻冰凍帝鄉尚在紅雲外噫嘻水大莫怨遲
還勝從前水小時

往年得常山徐生惠硯甚佳丁未會試為監場軍

士持去自後所得硯皆不及之偶然追憶成古風

一篇

常山硯多青紫色不徒發墨仍潤澤憶嘗過市親閱來
惡者堆塵美藏匿再三苦索始出之坐賈乃邀三倍息
徐生簡選持贈予獲之如獲琮與璧硯兮亦視為我用
口不能言似對臆南宮携去戰文場螳垤蜂房專一席
風檐交卷出門去竟為守舍軍士得脣焦口燥呼不還
亟欲往追天已黑歸來旅邸不成眠反覆思維良可惜

當時妄意復得之焚香叩易揲著策得夬之革觀繇辭
莫夜之戎即斯賊欲將此事白有司姓名無處稽尺籍
三衢舊穴尚可尋巧匠斲山盈左側猶傳上品多更多
紫袍玉帶殊輝赫雖然此特一物耳吾輩何為置欣戚
但恨珍奇失所遇此意英雄或能識

折桂寺

境豈浮屠勝東南秀此峰澗流千丈瀑崖長萬年松少
室留蒼鹿番君見小龍布鞵從此製雲嶠寄遐蹤

哭鄒汝愚

海舶傳消息傷心遂不還死同鄒別駕窮過蔡西山絕
識何由得英風竟莫攀惟餘前日疏傳寫遍人間

直科口占

南科自分一枝安北轉惟添待漏寒吏事兩京終是少
諫官直恐是閒官

題曹憲副采蓴卷

三泖秋霖浸四圍水邊未覺露葵稀金盤玉箸長安客

幾箇西風為汝歸

吳儼一首

儼字克溫宜興人成化丁未進士改庶吉士除
編修歷官侍講學士終南京禮部尚書謚文肅
有集

齒落

我年六十一已落第三齒若更活數年所存知有幾譬
若建重門一扉常自啓外侮窺其間孰禦而能止又若

築長堰隙穴不容蟻今已決尋丈不竭安肯已或言死
與生其機不在此此雖釋吾憂終焉非至理憶我初落
時掩口含羞恥只今落已慣與不落相似作詩紀歲月
亦漫戲云爾

羅

玘 一首

玘字景鳴南城人成化丁未進士改庶吉士除
編修歷南太常少卿吏部右侍郎贈禮部尚書
謚文肅有圭峰集

寓言送李希賢

山僧下山時僧送不出山但問下山僧此去何時還乳
水間一孔白雲留半間祇恐僧還少僧還誰閉關

李堂一首

堂字時升鄆縣人成化丁未進士累官工部右
侍郎總理河道有堇山集

堇山莊雜詠

紅葉亂紛紛秋光到小邨莫憐蒲柳脆幸與菊松存

援狄貪山果牛羊戀華門石床涼不寐流水激籬根

夏
鏃一首

鏃字德樹天台人成化丁未進士官南京大理

寺評事有赤城集

廣陵

九曲池亭龍氣消誰家水調共蘭橈眼前亡國無多恨
江水東邊是六朝

蘇
葵一首

葵字伯誠廣州順德人成化丁未進士改庶吉
士授編修出為江西提學僉事改四川終福建
右布政使有吹劒集

金陵寄故園諸子

霜冷天空一鴈飛鳳皇臺上幾霑衣一燈夜雨人無恙
萬里秋江夢獨歸醉客酒壚隨處好驚心人事異鄉非
明朝又發金陵道搔首長吟對落暉

周旋一首

旋字克敬慈谿人成化丁未進士以兵科給事中出參廣藩有西溪小橐

暮景

斜陽含霽景江上去人稀垂老猶為客經冬未授衣僧鐘和月起漁火隔煙微故國雲霄外多從夢裏歸

楊子器

五首

子器字名父慈谿人成化丁未進士知崑江高平嘗熟三縣擢吏部考功主事進驗封郎中出

為湖廣參議歷河南左布政使有柳塘先生遺

橐

詩話名父早朝詩多至三百首其終篇云除却
早朝無一事更從何處效驅馳可想見承平景
象矣排節宮詞若落盡燈花風定後移來樹影
月明初已判聖恩非我分不傳私語到人間詩
可以怨不具然乎至於春花將及九分九天氣
又新三月三則尋常百姓家皆可道之不類深
宮中
女也

早朝
五首

東方曙色未分明玉陛千官接武行華蓋殿開鑾駕出

部頭天樂一齊鳴

九重天上六龍飛御氣氤氲拂太微鳳閣西頭明月在
清光還照侍臣衣

風定天街玉佩和露華滿地濕緋羅更番奏對銀臺罷
聽得西班喚六科

仙漏迢迢隔絳霄兩行銀燭照起朝鼓聲纔歇鐘聲動
不放朝官過御橋

曉風吹動角端旗仗外祥光繞赤墀忽聽殿頭宣內閣

獨承密旨退朝遲

文

森一首

森字宗嚴長洲人成化丁未進士除知慶雲縣
擢浙江道御史建言廷杖回籍起南宮太僕寺
少卿終巡撫江西右僉都御史

九日

三載重陽菊開時不在家何期今日酒忽對故園花野
曠雲連樹天寒鴈聚沙登臨無限意何處望京華

沈山子云

語不在深
自然蘊藉

鄒智一首

智字汝愚合州人成化丁未進士改庶吉士坐
誣下獄免死謫廣東石城所吏目居四年得疾
暴卒有立齋遺集

詩話立齋以吉士建言請黜萬安劉吉尹直三
小人而進用王恕王竑彭韶三君子泰陵初政
不報既而萬尹被彈事去劉獨銜憾刺骨嗾其
黨攻吉中書人湯御史鴈辭連立齋及劉壽州
槩李主事文祥董沔陽傑謂數人以詩酒相結
納互相標榜詆毀朝政槩貽鴈書云夜夢一人

騎牛將墜馬手挽之不仆又見馬執五色石引
牛就正道人騎牛者朱也以爲馬將有扶持社
稷之力法司周內坐以妖言惑衆律罪當死賴
王端毅何文肅徐文靖諸公力持之得生而立
齋遠謫化州十戶所吏司既踰嶺從陳文恭講
學未幾天折惜夫其獄中詩云人到白頭終是
盡事垂青史定誰真夢中不識身猶繫又逐東
風入紫宸誦者傷之至辭朝詩云望見衣裳只
此時放臣逐客
讀之尤爲悽斷

辭朝

雲韶聲靜拜彤墀轉覺心驚不自持罪大故應誅兩觀
網疎猶得竄三危盡披肝膽知何日望見衣裳只此時

但願太平無一事孤臣萬死更何悲

傳

珪

一首

珪字邦瑞清苑人成化丁未進士累官禮部尚書兼翰林院學士贈太子太保謚文毅有北潭集

大寧僧舍

村外重關護原頭怪石蹲水聲來樹杪花影上山根寺古殘碑蝕僧貧破衲存俗塵銷不得何用訪柴門

周

詔一首

詔字希正長洲人成化庚子舉人由嘉祥儒學
教諭遷興府伴讀陞紀善食長史俸肅皇帝繼
大統從入擢太常寺卿兼翰林院侍讀卒賜祭
葬贈禮部右侍郎有歸吳和陶達意等集

詩話太常從龍舊學特拜清卿王耕原詩云漢
丈潛郎會風雲今日誰收第一勲夜半忽傳天
上詔虎符新拜宋將軍殆為公而發也或云指
陸武惠亦近是石文介作傳稱公因事納忠言
多剴切使更延其年不知大禮之議作何折衷
或未必為張桂等力持以致興獻立廟稱宗未

可定
蜀

飲酒和陶

得時言或違人皆以為是失時言合道求全反致毀毀
譽何足憑窮達亦偶一作不徒爾前程殊渺茫且來醉羅綺

明詩綜卷二十九